

Been Im Ju Pa Koe Ka daux

Phuk Lai Sigang Khri



Baux (1)

Khrawm Kaing Lai

Simin	Kaing Lai	Plah Lai
1.	Pa Phan Pa Deuh	1
2.	Grawh Grawng Pa Lih Phimap Ti Koe Piang Haktiex	13
3.	Grawng Pa Kheem Rawm	23
4.	Sijax Mukheu Pa Yuh Siyiex Mai Abraham	35
5.	Kawn Simex Pa Pon Khaing Gumlox Sijax Mukheu	45
6.	Krax Pa Cox Khre Siyiex Son Icak	55

Title: The living story from the Bible

Translated to the Wa language by:

Yex Ka Lin

Ai Sang Awng

Sam Lao Pao

I Rong Khun

Ai Kap Sin

Sai Rong Khun

Edition: First Draft


Date: 29. 7. 2016

Kheu lai riieng pa plak plih pakpeung gumlox Siyiex in kieh aik o
paox grawm mai ceu cao pa koe ka piang haktiex khawm uik
mawh buanson, riang rao ka daux
Yesux Khrit liak.


Translated from the English *Open Bible* Stories. Original work available at
unfoldingWord.org/stories

This work is licensed under the Creative Commons Attribution-
NonCommercial-ShareAlike 4.0 International License. To view a copy of this
license, visit <http://creativecommons.org/licenses/by-nc-sa/4.0/> or send a
letter to Creative Commons, PO Box 1866, Mountain View, CA 94042, USA.


Pa Phan Pa Deuh




Lai Yam Jah – 1-2




In mawh grawh grawng pa jah num riah ku ceu lih mawh ti koe heue. Siyiex phan haktiex, raoma mai can ceu pa koe ku ceu khawm uik ka daux bawg yam liah singaix heue. Yam jah piang haktiex mawh ngie pa vhaik pa tawb kheem ang koe tidtix. Viang mawh nan Khuan Siyiex ot vung viang ka piang rawm khankix heue.



Siyiex tawx lox ah, “Kieh pa riieng lih koe.” Mai pa riieng lih ti koe heue. Siyiex yaox ka mhawm pa riieng an mai kok mawh pon ngaix. Siyiex goih pa riieng mai pa vhaik, mai kok pa vhaik mawh ponbo heue. Siyiex phan pa riieng ka daux singaix tix heue.



Singaix ra, Siyiex phan haktiex mai raoma ka Gumlox Tix heue.



Nawh goih mee klawn tiex mai khrawm rawm khankix heue.
Dee kroh tiex Nawh kok mawh haktiex mai kok dee khrawm rawm
mawh rawm sigrit sigra heue.



Singaix loe, Siyiex tawx Gumlox Tix kieh rib riem, taux lhax mai khaox ku ceu khankix kuah ka piang tiex heue. Siyiex yaox ka mhawm ceu pa phan Tix heue.



Singaix pon, Siyiex phan singaix, khix mai sim-uing khankix heue. Siyiex kieh ceu ankix tawx pa rieng ka haktiex, son sang goih pon ngaix khaing pon sawm, praix klawng mai jhong khix mee num khankix heue.



Singaix phuan, Siyiex phan totiag pa chix hu chix mo daux rawm kax pa mawh khankix mai sim pa chix po piang raoma khankix heue. Siyiex yaox ka mhawm ceu ankix mai nawb buan ka piang ankix heue.



Awm pa tawx Siyiex lox Tix kieh totiag pa im ju ku ceu lih tix koe can ceu ankix kawx lih ti koe heue. Siyiex yaox ka mhawm ceu ankix heue.



Siyiex ah nin, " Ex phan kawn pui awm pakpeung Tix. Mai tawx sibrawm ka kix son sang kuang ka can ceu pa hoik phan ka piang haktiex"



Khaix an Siyiex teei phawng tiex phan kawn pui mai phlu bhawm pa im ju ka daux meeh nawh heue. Ceu kaux kawn pui an mawh Adam heue. Siyiex sum sipeem tix mu, kieh Adam ot ka daux son sang priex pau ka sipeem an heue.



Siyiex sum khaox ra gaw ka daux sigreung sipeem. Tix gaw mawh gaw khaox pa im ju, tix gaw mawh pa kieh tawng ka pa mhawm mai pa ang mhawm. Siyiex ah nin, “Chix tix ih ka plix khaox ku ceu pa koe ka daux sipeem viang mawh nan ang chix ti ih ka plix khaox pa kieh tawng pa mhawm mai pa ang mhawm pa koe sigreung sipeem. Phan ih ngaix mawx tag sang yaox ti yum tete.”



Siyiex ah nin, “Kawn pui ang khaw ti ot tix kaux nong nong ngie.” Kheu totiag khankix ang chix teem ka Adam.



Khaix an Siyiex kieh kawn pui laig it mai tee si-ang praok nawh tix nyaing yuh pui bun kah heue.



Yam yaox Adam ka bun an nawh ah nin, “ Pui in awm aux.” Nawh sum ceu kaux bun an mawh Evax. Siyiex phan pui bun son pui simex. Mawh kheu jao an simex yaox ti prah miex keeing tix, mai mawh nex nham tix mu tau mai moeng tix heue.



Siyiex phan pui simex mai pui bun awm grang pakpeung Tix heue. Siyiex yaox ka mhawm ceu ankix heue. Khaix an Siyiex nawb buan ka piang kiex son sang pre haoh hun kiex naog ka paing haktiex heue. Siyiex phan ceu ankix ka daux singaix liah heue.



Ka daux singaix aliah, Siyiex yaox ka hoik kaing pa phan pa yuh Tix mai Nawh laux lee Tix singaix an heue. Nawh Nawb buan ka daux singaix an mai kieh singax singeh heue. Mawh kheu jao laux lee Nawh Tix singaix an. Inkix hoik mawh grawh grawng pa hoik phan Siyiex ku ceu khawm uik heue.

K. Deeh Thawk Theng Ka Been

1. Siyiex phan haktiex mai can pa koe ku ceu khawm uik miex singaix?
2. Siyiex phan ceu pa tix ka daux singaix pon?
3. Siyiex phan kawn pui yuh ka mawx?
4. Siyiex yuh pa tix ka daux singaix aliah?
5. Khaox pa koe sigreung sipeem ra gaw mawh khaox ceu pa yuh ka mawx?
6. Mawh kheu pa tix Siyiex phan ka kawn pui?

Kh. Krax Pa Doh Rhawm Ka Been

1. Mawh kheu jao pa tix Siyiex phan kawn pui awm grang pakpeung Tix?
2. Maix yaox Siyiex mawh pa yuh ka mawx ka daux been in?
3. Yam yaox ex ka can ceu pa koe ka piang haktiex khawm uik, Ex keud mawh pa yuh ka mawx?

G. Krax Pa Deeh Shiao Daux Ju Tix Khaing Been

1. Ex chix ah kaing pa yuh ka mawx mawh kaing pa priex ex ka rhoi taix khaix caong cie Siyiex? Maix viex ka daux kaing pa yuh ka mawx?
2. Siyiex deuh ex kawn pui mawh pa koe ngawh koe jum, mawh kheu nan ex caw tix koe rhawm pa yuh ka mawx ka paox kawn pui tix?

Ng. Ceu Pa Rieb Gau Ex Khaing Been In

1. Siyiex mawh Cao pa phan ku ceu khawm uik. Pa luan khaing rhoi taix khaix caong Siyiex ang koe tix ceu kawx.
2. Can pa phan Siyiex khawm uik mawh pa mhawm.
3. Siyiex lheu moh kawn pui khaing tang ceu. Kawn pui mawh pakpeung Siyiex.

P. Baux Lai Pa Caw Tix Ci

Yohan 1:3

Pa koe ku ceu ku cawng koe kheu yuh Nawh, mai pa koe pa ang Nawh yuh ang koe tix ceu kawx heue.

Grawh Grawng Pa Lih Phimap Ti Koe Piang Haktiex



Lai Yam Jah 3



Adam mai Evax ot daux sipeem pa hoik sum Siyiex mai krax gaux rhawm gaux rhi tix heue. Viang kiex ang ceep kraung kawx kiex luat luan khaiing krax kaig tua heue. Mawh kheu jao phimap ang nyang koe piang haktiex bawg yam an. Kiex meed tix hu lai ling daux sipeem sikah mai Siyiex heue.



Viang mawh nan ka daux sipeem, koe si-uing pa kied lhak haing tix mu heue. Si-uing an chawk pui bun ah nin, “Siyiex rug ang cu pax ih plix khaox ku ceu pa koe daux sipeem tete lie?”



Pui bun ah nin, " Yiex chix ti ih plix khaox ku ceu pa koe daux sipeem. Phan yiex ih plih khaox pa koe sigreung sipeem, Siyiex ah yiex tag hoek krax yum tete."



Si-uing ah nin, "Pax ang doh hoek krax yum. Phan pax ih plix khaox an, ngai pax tag blah mai tawng ka pa mhawm mai pa ang mhawm awm Siyiex."



Yam yaox bun ka mawh plix khaox an mawh pa mhawm ti ih, koe grang nyawm ti jhak mai kheu simie nawh ti koe krax tawng krax yung nawh teei ti ih plix an heue. Khaix an nawh tawx mex tix ih heue.



Kiex ra kaux blah ngai mai tawng ka ang tix ceep kraung, kiex caing ti ceep kraung ka lhax khaox ruh heue.



Yam bo praix, kiex mhong lox pa hu Siyiex daux sipeem, kiex mox tix sinax khaox khankix heue. Siyiex kok ka pui simex mai chawk ah nin, "Ot pax dee mawx?" Nawh pawk lox Siyiex ah nin, "Yiex mox tix kheu ang koe kraung ceep."



Siyiex chawk ah nin, "Mawh mawx pa ah pax ang koe kraung ceep. Pax hoik ih ka plix khaox pa ang Aux cu pax ih lie? Pui simex pawk ah nin, " Mawh bun pa tawx Maix Cao ot mai aux pa tawx aux ih. Bun kawx ah nin, "Mawh si-uing pa pie ti tawx aux ih."



Siyiex kok ka si-uing mai ah nin, "Maix tag pon krax pa jhax lawg. Maix tag yaox mo ka vaid tix mai ih phawng tiex tom sidah ju tix. Ceu pa koeng tag koe sinax ceu cat maix mai ceu cat pui bun. Ceu cat pui bun tag dig kaing maix khlaix mai maix tag mat yuh loek caong nawh heue."



Siyiex ah nin ka pui bun, "Maix tag kha rhawm rhi tix ka daux pa keh kawn. Maix tag lo ka mex tix mai nawh tag sang kuang ka maix."



Siyiex ah nin ka pui simex, "Mawh kheu nghiit maix lox moeng tix ang priex ka lox pa tawm aux, haktiex tag mawh pa jhax lawg kheu maix. Maix tag yaox ti ih khaing tiex ka daux pa kha rhawm tix tom sidah ju tix heue. Kheu mawh maix phawng tiex maix tag deeh ing ka phawng tiex." Pui simex kok moeng tix mawh Evax, kheu mawh nawh miex pui pa im ju. Siyiex yuh kiex ceep kraung ka hak totiag heue.



Siyiex ah nin, "kawn pui hoik lih ti tawng pa mhawm mai pa ang mhawm awm Siyiex. Yam in paw lai kieh nawh nyeu taix tix teei ti ih ka plix khaox im ju an mai im ju leeing ju leeing phan heue." Mawh kheu nan Siyiex grheu kiex lih hu khaing daux sipeem Eden. Siyiex deuh Cherubin pau sipeem Eden plak lih singaix mai tawx vaig ngu sah pa lawm ka nawh son sang pau ka khaox pa im ju an heue.

K. Deeh Thawk Theng Ka Been

1. Si-uing nyaw glaw ka bun yuh ka mawx?
2. Adam mai Evax caing ti ceep kraung ka lhax khaox ceu pa tix, mawh kheu jao pa tix?
3. Siyiex jhax lawg ka Adam mai Evax yuh ka mawx?
4. Siyiex kieh ceu pa tix lih ti koe sinax si-uing mai ceu cat bun?
5. Dee sidah Siyiex yuh pa tix ka kiex?

Kh. Krax Pa Doh Rhawm Ka Been

1. Phimap ah ex mawh pa yuh ka mawx? Buanson phimap mawh ceu pa tix?
2. “Si-uing” ah ex sang ah ka ceu pa tix? Kheu pa tix nyhaw glaw ka Evax?
3. Ex yaox jhawm kawn pui mawh pa yuh ka mawx khaing been in?
4. Mawh kheu ang kawn pui nghiit ka lox Siyiex, kawn pui lih ti mawh yuh ka mawx?

G. Krax Pa Deeh Shiao Daux Ju Tix Khaing Been

1. Awm Adam mai Evax du phimap ka paox tix, ka daux ju ex, ex hoik du phimap tix ka pui tang kaux ka ceu pa tix?
2. Viang Siyiex hoik tawng kawn pui yuh phimap kawx, Siyiex kawn kok ka kawn pui kheu jao pa tix? Ka daux krax pa im ju maix, Siyiex sikah mai maix ka daux blawng pa yuh ka mawx?
3. Yam in ju ka piang haktiex, phan ex prah ka Siyiex mai tang im ju ka riang rao pa koe tix, ex sang li ti mawh ceu pa yuh ka mawx?
4. Ka daux ju maix pa nyaw glaw maix singai khaing Siyiex mawh ceu pa tix? Son sang chix via ka ceu in kix, maix caw tix yuh ka mawx?

Ng. Ceu Pa Rieb Gau Ex Khaing Been In

1. Phimap kieh ex singai khaing Siyiex.
2. Phicaox nyaw glaw ka ex kawn pui, son sang hoek krax laux leeing.
3. Mawh kheu ang cu nghiit lox Siyiex, kawn pui hoek krax yum mai pon krax jhax lawg Siyiex.

P. Baux Lai Pa Caw Tix Ci


Romax 6:23

Grawh grawng nawh ngawh riang phimap phigrham mawh krax yum. Viang mawh kawx nan khawng phak buanson pa tawx Siyiex mawh ju leeing ju leeing phan ka daux Simiang ex Yesux Khrit heue.


Grawng Pa Kheem Rawm




Lai Yam Jah 6-8




Khaix an tom hoik kied rheung num kawn pui khankix im ju piang haktiex. Kix mawh pui ting phimap mai koe rhawm ti keud yuh ceu pa caox heue. Mawh kheu nan Siyiex tom tat rhawm Tix sigrhah tik kawn pui piang haktiex ka rawm.



Viang mawh nan Noax mawh pui pa khaw ka rhawm Siyiex. Nawh mawh pui rah see, pui pa grum naog, pui pa hu ing tau mai Siyiex. Siyiex plak jhi nawh yaox son sang ci yang haktiex ka pa kheem rawm. Siyiex nhie nawh yuh reu ting tix mu.




Reu an krax lang caw ti kieh koe 300 sawk, krax vieh 50 sawk, krax lhaong 30 sawk. Caw ti yuh reu an ka khaox Gawpharax mai kieh koe 3 thaix. Caw ti kieh koe lawg tom nie, koe braux mai siviex iak khankix heue. Ka daux reu an nyiex ma Noax mai totiag pa im ju pa mawh mhaing mai shiang ku mawx ku an tag sang yaox ti luat luan khaing kheem rawm mai tag sang yaox tix im ju heue.



Noax hawt ti yuh awm pa krai Siyiex. Nawh mai kawn simex nawh 3 kaux yuh reu ting awm pa krai Siyiex. Reu an mawh kheu sidaing ting kix yaox ti yuh tom rheung num heue. Noax tawx satix ka kawn pui nhie pui nghiit lox Siyiex mai krai kix mhong grawng sang kieh Siyex rawm ting kheem ka haktiex. Viang mawh nan kix nu nai mai nyiah maong ka lox pa krai Noax heue.



Nyiex ma Noax khrawm pa ih pa un son nyiex ma tix mai son totiag khankix tom kub. Khaix an Siyiex nhie kix 8 kaux, pa mawh Noax mai moeng nawh, kawn simex nawh 3 kaux mai moeng kix khankix laig ka daux reu.




Siyiex nhie Noax sau totiag, sim pa mawh mhaing mai shiang ceu mawx ceu an ka daux reu. Son sang tan lu ka Siyiex, Noax teei totiag mhaing mai shiang aliah ku. Khaix hoik laig kix daux reu khawm uik, Siyiex nyeep siviex heue.



Khaix an rawm keut khaing dee raux khawm uik hoik bih mai siviex raoma hoik baoh, lhiex lih 40 ngaix 40 sawm heue. Kheu ting rawm, gawng lua ting khankix hoik glip khawm uik heue.




Totiag khankix mai kawn pui pa koe ka piang haktiex hoik yum khawm uik. Mawh nyiex ma Noax mai ceu pa koe ka daux reu khaing pa pon ti luan mai klawd heue.



Khaix ang Ihiex lai lih reu kawn ot hu piang rawm 150 ngaix. Khaix an reu kaog ka piang gawng Ararat. Piang haktiex rawm ang nyang hit. Khaix hoik rheung 3 khix, dee choek gawng tag blhiien ti lih khaing rawm heue.



Khaix hoik rheung 40 singaix, son sang tawng ka grawng hit rawm Noax paoh siviex iak mai ploi lak tix mu. Lak an ang lai deeh hoek mai pu hu vung viang tom sidah bawg yam krox haktiex heue.



Baox tix bawg nawh ploi sikaux hu plak praix son sang tawng grawng hit rawm. Mawh kheu kawn koe rawm sikaux an deeh ing ka reu. Khaix an aliah ngaix deeh baox ploi sikaux an pu plak praix. Noax hoik tawng ka hit rawm kheu sikaux an deeh hoek plak bo khawm viex tix lhak khaox Sanlon ka gaoh tix heue.




Baox khaix an aliah ngaix Noax baox ploi sikaux an hu. Noax hoik tawng ka hit rawm kheu ang sikaux an lai deeh hoek heue.




Khaix an 2 khix Siyiex ah nin, “Viex nyiex ma maix lih khaing daux reu. Kieh pui nyiex ma maix mai totiag khankix pre haoh hun ka piang haktiex.”



Khaix hoik lih khaing daux reu, Noax teei totiag pa singax, sim pa singax hoek mai gleeing ti tan piang khu dee tan heue. Siyiex khaw rhawm ka krax tan Noax mai nawb buan piang nyiex ma kix heue.



Siyiex ah nin, “Viang kawn pui yuh pa caox jah tom iak kawx Aux ang lai kieh rawm kheem haktiex baox tix bawg awm pa hoik yuh Aux bawg in ka piang kawn pui mai can ceu pa im ju khankix ka piang haktiex.”



Khaix an Siyiex yuh siyawng lih khaing ka daux pai awm bawg liang. Phan yaox siyawng, Siyiex doh keud ka sijax mukheu pa yuh Tix sinax can ceu pa im ju pa koe piang haktiex mai Siyiex heue.

K. Deeh Thawk Theng Ka Been

1. Mawh kheu pa tix Siyiex simie tix sigrhah ka haktiex?
2. Noax mawh pui pa yuh ka mawx?
3. Siyiex nhie Noax yuh reu pa yuh ka mawx?
4. Khaix hoik yuh reu mawh pui mawx pa laig daux reu mai Siyiex nhie Noax sau totiag yuh ka mawx ka daux reu?
5. Son sang tawng grawh grawng hit rawm, Noax yuh ka mawx?
6. Khaix hoik lih khaing reu, Noax mai nyiex ma nawh yuh pa tix? Siyiex tawx lox sijax mukheu yuh ka mawx ka kix?

Kh. Krax Pa Doh Rhawm Ka Been

1. Maix yaox yuh ka mawx ka grawng pa cu nghiit Noax ka lox Siyiex?
2. Mawh kheu pa tix pui khankix ang nghiit ka lox pa krai Noax?
3. Mawh kheu pa tix Siyiex khaw rhawm ka krax pa tan Noax?
4. Kheu pa tix Siyiex ang lai koe rhawm tix ci yang haktiex ka rawm baux tix bawg?

G. Krax Pa Deeh Shiao Daux Ju Tix Khaing Been

1. Maix pon riang rao yuh ka mawx khaing grawng nyiex ma Noax?
2. Yam ex rieb ka pa cau Siyiex, ex lo tix koe rhawm pa yuh ka mawx?
3. Son sang pon pui ti tawng ka Siyiex, ceu pa pon yuh maix mawh pa tix?
4. Kheu pa teem Siyiex maix luat luan khaing krax kha, maix hoik pon yaogyaw buanson Siyiex yuh ka mawx?

Ng. Ceu Pa Rieb Gau Ex Khaing Been In

1. Kheu pa cau Siyiex mai krax pa cu nghiit Noax ka Siyiex, Noax pon yuh reu ting mai luan khaing krax yum heue.
2. Siyiex khaw rhawm ka krax pa tan ex khawm rhawm rhi tix heue.
3. Krax pa cu nghiit mawh krax pa luat luan mai krax pa ang cu nghiit mawh pa viex ex hu krax laux leeing heue.
4. Viang kawn pui yuh pa caox kawx Siyiex chix pluat ploi phimap mai moh ka kawn pui heue.

P. Baux Lai Pa Caw Tix Ci

Lox Kab 12:15 (kh)

Pui pa cu nghiit ka lox pa tawx krax keud, mawh pui pa koe pingnya heue.


Sijax Mukheu Pa Yuh Siyiex Mai Abraham




Lai Yam Jah – 11-15



Khaix hoik kheem rawm, yam hoik rheung tom nie num kawn pui pre haoh hun, kix mawh pui tix ceu ngie mai sikah lox tix ceu ngie khaing heue. Kix ang cu nghiit ka Siyiex. Ja lao kix sang tah ot piang haktiex, kix khrawm paox tix ot tau mai sum veng ting tix veng heue.




Kawn pui yaw rang di ka cao tix mai deuh lox Siyiex ang koe ceu. Yam yaox Siyiex kix yuh nyiex lhaong tom sang cux raoma, Siyiex tawng kix sang yuh ceu pa caox heue.



Mawh kheu nan Siyiex kieh lox sikah kix tang khaing paox tix mai kieh prung prang ka piang haktiex ku dah ku dee heue. Ang lai kieh kix sum veng. Ceu kaux veng an mawh Babelax. Dee bleeh Babelax mawh “Pa Sivix”.




Khaix hoik rheung tom nie num Siyiex sikah mai Abram. Siyiex ah nin, “Abram, lih hu khaing haktiex in, khaing paox ceu cat maix, khaing nyiex ma maix mai hu ka meung tag sang jhi aux ka maix.”



Abram nghiit ka lox Siyiex, viex moeng tix Sarie mai siliex tix mai khawng eei brie liang khankix lih hu ka dee ploi Siyiex daux haktiex Khanan heue. Abram ot daux haktiex Khanan tom rheung num. Yam an mawh yam yuh Siyiex gumlox sijax mukheu mai Abram heue.



Siyiex tawx gumlox sijax mukheu ah nin ka Abram, “Jhak ka dee ot maix mai maong tix jhak plak lih singaix, plak klip singaix, plak laong mai plak seh, haktiex pa yaox maix khawm uik Aux tag sang tawx ka maix mai doeh simie ceu cat maix. Aux tag nawb buan piang maix mai kieh maix pon min plak ngai heue.”



Siyiex ah nin ka Abram, “Aux tag kieh ceu cat maix mawh pui ting. Aux tag nawb buan ka piang pui pa nawb buan piang maix. Aux tag jhax lawg ka pui pa jhax lawg ka maix. Kheu maix kawn pui tag pon buanson.” Abram nghiit lox Siyiex mai kieh kawn nyiex ma tix pat hak khawm uik heue.



Siyiex ah Abram mawh keeing krax yum rhawm. Viang mawh nan Abram mai Sarie kheu ang koe kawn ang chix ti mawh keeing pui. Viang mawh nan kiex mex moeng pau gumlox sijax mukheu Siyiex tag sang grum naog ka daux krax yum rhawm tix heue.



Tix singaix, Abram yax ka cao giex kaing li pa ting cie Siyiex pa mawh Malakhizediek. Nawh nawb buan piang Abram ah nin, “Siyiex pa ting pa lhaong Cao pa phan haktiex mai raoma nawb buan kah Abram liak” Abram kawx tawx kao son tix son kah Nawh heue.

K. Deeh Thawk Theng Ka Been

1. Yam pre haoh hun kawn pui piang haktiex, kix koe rhawm rhi pa yuh ka mawx?
2. Kawn pui kraix khrawm paox tix yuh pa tix?
3. Kheu pa tix Siyiex kieh lox sikah pui tang khaing paox tix?
4. Siyiex nhie Abram yuh pa tix?
5. Siyiex tawx gumlox sijax mukheu ka Abram yuh ka mawx?
6. Cao giex kaing li pa ting cie Siyiex ah yuh ka mawx ka Abram?

Kh. Krax Pa Doh Rhawm Ka Been

1. Mawh kheu pa tix yaox ti kok veng an mawh veng Babelax “Pa Sivix”?
2. Maix yaox yuh ka mawx ka piang pa ah Siyiex, Abram mawh keeing krax yum rhawm?
3. Rhawm rhi kawn pui mai alo Siyiex tang yuh ka mawx?

G. Krax Pa Deeh Shiao Daux Ju Tix Khaing Been

1. Daux been in kawn pui yaw rang di ka cao tix mai deuh lox Siyiex ang koe ceu. Ka daux ju maix, maix hoik pon deuh lox Siyiex koe ceu yuh ka mawx?
2. Awm Abram cu nghiit ka Siyiex mai hu ka haktiex pa jhi Siyiex. Maix pon jhi krax cu nghiit maix ka Siyiex daux pa yuh ka mawx?

Ng. Ceu Pa Rieb Gau Ex Khaing Been In


1. Siyiex koe rhawm ti kieh kawn pui pre haoh hun mai tah hu ka piang haktiex ku dah ku dee.
2. Phan ex tang yaw rang di ka cao tix, krax im ju ex kawx tag sang awm nyiex ting Babelax dee koe pa sivix jheung jheung.
3. Phan ex koe krax yum rhawm awm Abram, ex tag mawh daoh doe Abram mai tag sang pon buanson khaing Siyiex awm gumlox sijax mukheu pa tawx Siyiex ka Abram.

P. Baux Lai Pa Caw Tix Ci

Lai Yam Jah 12:2

“Aux tag yuh maix mawh ceu cat pa ting pa lhaong, aux tag nawb buan ka piang maix mai kieh min ceu kaux maix ting lhaong, mai maix tag mawh pa tawx buan ka pui heue.”

Kawn Simex Pa Pon Khaing Gumlox Sijax Mukheu



Lai Yamj Jah 16-22



Viang Abram Mai Sarie pau gumlox sijax mukheu Siyiex tom rheung num kawx kiex ang koe kawn. Siyiex baox tawx gumlox sijax mukheu ka Abram grawng tag sang koe kawn simex nawh mai grawng tag sang kieh doeh simie ceu cat nawh awm sim-uing raoma. Abram yum rhawm ka gumlox sijax mukheu Siyiex.




Sarie mawh kheu yaox tokaux tix riex ju mai ang koe kawn, nawh tawx Abram teei ka siliex bun tix pa mawh Hagarax heue.



Yam tee Abram ti cie Hagarax, Hagarax koe kawn simex tix kaux mai kok ceu kaux nawh mawh Ishamelax. Abram simie Siyiex nawb buan piang Ishamelax. Siyiex ah nin, “Aux tag nawb buan piang Ishamelax. Viang mawh nan Aux ang pon yuh sijax mukheu mai nawh, kheu ang nawh mawh kawn pa hoik tawx Aux sijax mukheu ka son maix.



Moeng maix Srie tag sang keh kawn simex. Kheu mawh nawh kawn simex pa pon khaing gumlox sijax mukheu Siyiex tag kok ceu kaux nawh mawh lcak. Aux tag sang kieh doeh ceu cat nawh mawh pa ting.” Khaix an Siyiex kok ceu kaux Abram mawh Abraham mai kok ceu kaux Sarie mawh Sara. Dee bleeh Abraham mawh “keeing ka kawn pui”, mai dee bleeh Sara mawh “Simiang kawn pui” heue.



Dee sidah Siyiex tawx Sara koe kawn simex. Yam an Abraham hoik koe ju 102 num, Sara koe ju 90 num. Awm pa hoik tawx Siyiex sijax mukheu kiex sum ceu kaux nawh mawh lcak.




Son sang cheuk cheu ka krax yum rhawm Abraham Siyiex nhie nawh tan kawn simex tix pa koe tix kaux khaing pa mawh lcak. Abraham cu nghiiet mai hawt ti yuh awm pa ah Siyiex.

Abraham phiawk kawn tix lcak ka maox mai yaog ti sau piang khu dee tan. Khaix an nawh teei vaig mai nyeu taix tix son sang pah ka lcak. Yam an Siyiex ah nin ka nawh, “Maix paw teeh ka kawn nyawm in. Aux hoik tawng grawng lhat graung maix ka Aux. Grawh grawng nawh maix ang thiang pa mhaing Aux kawn simex maix pa koe tix kaux khaing heue.”



Yam an Abraham yaog ngai tix jhak mai yaox ka kawn yung mhaing tix mu pa vung vhiien rung tix ka yeem heue. Abraham teei kawn yung an mai gleeing piang khu dee tan tang kawn simex tix heue.



Siyiex ah nin ka Abraham, “Aux tag nawb buan ka maix ku jheeng jheeng mawh kheu ang maix thiang pa mhaing Aux maix tan kawn simex maix pa koe tix kaux khaing heue. Aux tag kieh doeh ceu cat maix nie baox haoh hun awm sim-uing raoma mai awm mhaik pa koe praok rawm sigrit sigra heue. Can ceu pui khawm uik kawx tag pon buanson kheu maix heue.”

K. Deeh Thawk Theng Ka Been

1. Siyiex tawx gumlox sijax mukheu pa tix ka Abram mai Sarie?
2. Mawh kheu pa tix Sarie tawx Abram teei ka Hagarax?
3. Kheu pa tix Siyiex ang cu ti tawx lox sijax mukheu ka Ishamelax?
4. Siyiex loh ceu kaux Abram mai Sarie yuh ka mawx? Koe dee bleeh yuh ka mawx?
5. Siyiex cheuk cheu krax yum rhawm Abram yuh ka mawx?
6. Siyiex cox khre totan tang lcak yuh ka mawx?
7. Siyiex nawb buan ka piang Abram yuh ka mawx?

Kh. Krax Pa Doh Rhawm Ka Been

1. Kheu pa tix Siyiex kieh Abram pau gumlox sijax mukheu Nawh tom rheung num?
2. Kheu Sarie ang pex pau ka gumlox sijax mukheu Siyiex, lih tix mawh krax sivix ceu pa tix?

G. Krax Pa Deeh Shiao Daux Ju Tix Khaing Been

1. Maix pon rieb gau ceu pa tix khaing gawng Abraham mai Sara?
2. Maix pon rieb gau ceu pa tix khaing gawng lcak?
3. Abraham pon tan kawn simex pa moh tix, tix kaux khaing ka Siyiex. Awm an daux ju maix, maix pon tawx pa mhawm ceu pa moh tix ka Siyiex lie?

Ng. Ceu Pa Rieb Gau Ex Khaing Been In

1. Phan ex ang pex pau ka bawg yam cie Siyiex, pa yuh ex khawm uik mawh pa giex going mai Siyiex ang rieb kah.
2. Pa keud kawn pui viang ang chix ti mawh, phan ex yum rhawm ka Siyiex, pa ang Siyiex chix yuh ang koe tix ceu kawx heue.
3. Yam sipub ex krax pa cheuk cheu, phan ex kaux sijax ka Siyiex awm Abraham, ex kawx tag sang pon buanson heue.
4. Siyiex koe rhawm kieh ex tawx ceu pa mhawm khaing paox tix, pa koe ka daux ju ex ka Nawh.


P. Baux Lai Pa Caw Tix Ci

Hebrie 11:1

Krax yum rhawm kienie, mawh ceu pa uik vhah rhawm grawng sang pon ka ceu pa keud pot jun pot kah, mai mawh pa sang een rhawm tix pon ka ceu pa ang nyang bax yaox heue.

Krax Pa Cox Khre
Siyiex Son Icak

Lai Yam Jah 24:1–25, 26




Awm hoik riex ju Abraham hu sipie sipie kawn nawh Icak kawn hoik ting huan heue. Yam an Abramham ploi kawn cau tix hu sawg moeng son kawn simex tix Icak ka dee ot ceu cat tix heue.



Yam hu kawn cau an Siyiex kieh nawh sipub ka kawn saux Puxke Abraham pa mawh Rebekax heue.



Rebekkax kawx prah pui nyiex ma tix mai hu hawt khaix kawx cau an heue. Ang rheung lcak kawx moh ka Rebekkax mai teei nawh mawh moeng tix heue.




Khaix hoik rheung tom nie num Abraham kawx yum heue. Yam an gumlox sijax mukheu pa tawx Siyiex lih ti mawh son lcak heue. Viang mawh nan Rebekkax ang koe kawx. Phan ang koe kawx simex lcak tag ang chix ti mawh keeing son can ceu pui khawm uik heue.



Khaix hoik rawg lcak buan son moeng tix Rebekkax, Rebekkax koe kaux heue.



Yam koe kaux Rebekkax, Siyiex ah nin ka nawh, “Kawn Ai tag sang yaox ti yuh siliex pux tix”



Yam hoik naog bawg yam, nawh keh kawn brawm heue. Kawn pa keh sivoe raoh nex nham, nie hauk awm kraung ceep piang kaux nawh, kix tom kok ceu kaux nawh mawh Esaw heue. Pa keh khaix, pa mawh pux mawh kheu giex loek caong Esaw yam keh, kix tom kok ceu kaux nawh mawh Yakop heue.

K. Deeh Thawk Theng Ka Been

1. Abraham ploi pui mawx hu sawg moeng son lcak? Ploi nawh hu dee mawx?
2. Kawn cau Abraham yaox ka pui mawx?
3. Khaix hoik yum Abraham, gumlox sijax mukheu Siyiex hoek ka piang pui mawx?
4. Mawh pui mawx pa rawg buan son Rebekxax?
5. Yam koe kaux Rebekxax, Siyiex ah pa tix ka nawh?
6. Ceu kaux kawn simex Rebekxax ra kaux mawh pa tix?

Kh. Krax Pa Doh Rhawm Ka Been

1. Mawh kheu pa tix Abraham ang tawx lcak tang hu sawg tix cie ka moeng?
2. Viang lcak mai Rebekxax ang sax yaox paox tix kawx, mawh kheu jao pa tix kiex rieb tix mawh nyiex ma tau?
3. Kheu pa tix Siyiex krai ka Rebekxax, “Kawn Ai tag sang yaox tix yuh siliex ka pux tix”?
4. Ka daux been in maix yaox beeh glawm miex keeing koe yuh ka mawx ka piang kawn praix?

G. Krax Pa Deeh Shiao Daux Ju Tix Khaing Been

1. Kheu krax rawg buan lcak, nyiex ma kiex pon ceu pa simie tix cie khaing Siyiex heue. Ka son nyiex ma maix, maix hoik pon kah sivix ceu pa tix kheu krax rawg buan?
2. Ex sang chix sum nyiex ma pa khaw caw mai rhawm rhi Siyiex yuh ka mawx?

Ng. Ceu Pa Rieb Gau Ex Khaing Been In

1. Siyiex mawh Siyiex pa kaux sijax mai chix tawng ka ku ceu khawm uik.
2. Kawn praix khankix mawh khawng phak pa tawx Siyiex ka ex.
3. Siyiex nawb buanson ka piang kawn praix pa cu nghiit ka lox miex keeing tix heue.

P. Baux Lai Pa Caw Tix Ci

Yaogyaw 127:3

Kawn praix pa keh khankix mawh sin pa tawx Siyiex mai mawh khawng phak pa tawx Nawh Cao heue.

